



B
126
F35
1756
v. 2



EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5





關學編卷三

朝邑

趙蒲廷璧重刻
李元春時齋續編

三原

劉映菁毓英補刻
外孫張集慶校

明

容思段先生

先生名堅字可久蘭州人初號栢軒後更號容
思義取九容九思也學者稱容思先生生而剛
方穎異讀書即知正學年十四為郡諸生見緱
山陳先生書銘于明倫堂有羣居慎口獨坐防

心之語酷愛而敬誦之遂慨然以為聖賢可學
而至年十七王父歿白其父治喪不用浮屠法
凡當世宿儒宦游於蘭者無不師之于經史蘊
奧性命精微不究其極不止也動作不苟人以
伊川擬之正統甲子領鄉薦明年下第歸鄉之
士大夫多遣子弟就學先生以師道自尊教法
嚴而造就有等士類興起已已

英廟北狩應

詔詣闕上書不報乃裹糧買舟南游由齊魯

淮楚以至吳越訪求同志之士相與講切得聞
子與白良輔輩定交焉逾年始歸學益有得景
泰甲戌登進士以文名差纂山西誌明年誌成
復命尋移疾歸讀書于五泉小圃依岩作洞以
爲會友講習之所有得即形於詩有云風清雲
淨雨初晴南畝東阡策杖行幽鳥似知行樂意
綠楊烟外兩三聲論者謂宛然有浴沂氣象越
五年爲天順己卯選山東福山知縣福山故僻
邑先生以德化民刊布小學諸書令邑人誦誦

復以詩歌興之必欲變其風俗或謂其迂闊不能行先生獨謂天下無不可化之人無不可變之俗嘗有詩曰天下有材皆可用世間無草不從風始終不少懈由是陋俗丕變海邦島嶼渢渢乎有絃誦風既六載以李文達公薦超擢知萊州府廼先生與文達公竟未面也先生治萊如治福山時召郡縣官師與燕俾言志咏歌以申政教未期月萊人大化以憂去既禪不遽北上乃訪周廷芳于泰州訪張立夫于鳳翔講學

求友孜孜不暇其于功名利達澹如也久之復
補南陽在南陽慨近世學者以讀書媒利祿階
富貴士尠知聖賢之學乃倡明周程張朱與古
人為學之意建志學書院聚郡庠及屬治諸生
親授講說又以民俗之偷由未預教乃遴屬治
童蒙授以小學孝經文公家禮教民俗言諸書
俾之講習又創刻二程全書胡致堂崇正辨諸
書俟盈科者給授士習翕然改觀又創節義祠
祀古聖母烈女以風勵郡俗尤嚴逆巫尼不使

假左道傷風化會有女纓而自經以殉夫死者
先生率僚屬師生往吊為具棺歛卜地合葬已
又奏表其閭由是郡人雖婦人女子皆為感
化先生為政持大體重風教不急功利不規規
于簿書不以毀譽得失動其心凡屬吏不法者
即案問不少貸民或良或奸相宜訓治與民休
息在南陽八年郡人戴之如父母其敬畏之至
若家有一段太守者治行為天下第一以直道
不能諧時遂致政歸乃結廬蘭山之麓扁曰南

村曰東園取淵明詩昔欲居南村及青松在東
園意授徒講業相羊吟詠以自樂然于時政闕
失民情困苦則又未嘗不憂形於色成化甲辰
卒年六十有六門人私謚曰文毅先生性素孝
友治父母喪一遵古禮事兄椿曲盡弟道居家
嚴內治崇禮教凜然為鄉邦典刑與人尤篤于
分義友人唐知縣廷器貧甚其歿也為具棺歛
以終襄事并志其墓方伯石公某曾孫以貧鬻
于人乃垂涕捐貲贖還俾主其祀業師周公麟

歿為撫其後每至其家坐必避席焉先生雖未
居言路而屢有建白如請修龍逢比干祠墓請
從祀元儒劉因請旌表孝行節義請開言路諸
封事皆鑿鑿有關國體補風化益先生之學近
宗程朱遠邇孔孟而其功一本于敬嘗言學者
主敬以致知格物知吾之心即天地之心吾心
之理即天地之理吾身可以叅天地贊化育者
在于此必以命世大儒自期而不可自暴自棄
以常人自居有負為人之名所至從游者衆多

所成立如同郡董學諭芳羅僉憲睿彭少保澤
孫孝廉芳秦州周布衣蕙山西董僉憲齡福山
張同知璵南陽柴尚書昇王文莊鴻儒熊少叅
紀張孝廉景純皆門牆尤著者郡人陳祥贊云
距釋排聃吾道是遵士趨歸正鄉俗以淳總往
開來遠探濂洛文清之統惟公是廓彭澤撰墓
碑云先儒謂道自堯舜以來至孟子沒失其傳
焉匪道不傳學者託之言語文字而無深造力
踐之功也至宋周程三夫子出至晦庵朱先生

始極主敬致知力行之功上繼孔孟之統元魯
齋許文正公我明敬軒薛文清公以篤實輝
光之學繼其絕此固萬世之公議也若我南陽
太守容思先生段公其克尊信斯道而致深造
力踐之學者歟論者以為知言所著有容思集
栢軒語錄行世

默齋張先生

先生名傑字立夫號默齋鳳翔人父璉工部主
事先生生有異質穎悟過人稍長入郡庠卓然
以聖賢自期年二十一登正統辛酉鄉薦乙丑
中乙榜以親老就山西趙城訓導居官六年惟
以講學教人為事一日薛文清公過趙城與先
生論身心性命之學文清公嘆服而去先生之
學由是益深值歲祲捐俸賑饑雖所捐無幾亦
寒羶所難景泰辛未工部公捐館舍先生徒跣

奔歸喪葬悉以禮先是里俗多用浮屠法先生一切屏去鄉人化之以之以養母不出天順癸未母棄養既禫有司勸駕先生戚然曰吾少也力學以明道祿仕以養親今吾親終矣而學無所得尚欲仕乎遂不復出因賦詩自責曰年幾四十四此理未真知晝夜不勤勉遷延到幾時益大肆力于學居恒瞑目端坐至于移時起則取諸經子史朗然諷誦或至丙夜後已最愛涵養須用敬進學在致知二語因大書揭座右造

詣日深弟子從遊者日衆乃拓家塾以五經教授學者稱為五經先生名重一時巡按御史某薦先生為提學僉事不報成化乙酉應天聘典文衡謝不往辛卯茶臺馬公震行部漢南特遣諸生黃照王宣輩奉書載幣聘先生攝城固學事先生復書略曰天地生人無不與之以善聖賢教人亦無不欲其同歸于善是知善者人所自有而自為之先覺之覺後覺如呼寐者而使之寤耳但古之學者從事于性情而文辭所以

達其意今之學者專務文詞反有以累其性情
其今年五十有一矣方知求之子此以尋古人
向上之學雖得其門未造其域汲汲皇皇恐虛
此生嘗自念僻處一方獨學無友每欲遠遊質
正高明奈有寒疾不可以出况鄉黨小子相從
頗衆豈能遶及他方邪亦謝不往與舉蘭旼先
生堅趙侍御英河東李學博泉秦州周布衣蕙
相與論學而旼尤稱契厚嘗贈以詩有云萬徑
千蹊吾道害四書六籍聖賢心聖賢心學真堪

學何用奔馳此外尋而先生詩中亦有今宵忘
寢論收心之句學者爭傳誦焉或勸先生著書
曰吾年未艾猶可進也俟有所得為之未晚乃
竟未及著書而卒是為成化壬辰十月十二日
距生永樂辛丑八月十九日生僅五十有二先
生為人篤于孝友事二親曲盡子道與兄英為
異母同居五十年無間言姊早卒撫其子若已
出教之成立御子弟一以禮法內外斬斬嘗自
讚曰讀孔孟書學孔孟事知有未真行有未至

惟日孳孳以求其所無負也其勤勵如此先生
坊若干年郡守趙公博白兩臺為先生建祠于
冢塾之左以供祀事長平郭公定為記郡倅范
公吉稱先生以五經教授明心學于狂瀾既倒
之餘以四禮率人挽風化于頽靡不振之秋以
端實淡泊飭躬砥行垂休光于千百載之後可
謂一代人物矣識者以為實錄云

小泉周先生

先生名蕙字廷芳號小泉山丹衛人後徙居秦州因家焉年二十聽人講大學首章奮然感動始知讀書問字為臨洮衛軍戍蘭州守墩聞容思段先生集諸儒講理學時往聽之有聞即服行久之諸儒令坐聽既而與坐講既而以為畏友有疑與訂論焉段先生最以聖賢可學而至教示進為途方段先生曰非聖弗學先生曰惟聖斯學遂殫力就學究通五經篤信力行慨然

開之句後又贈以二詩云小泉泉水隔烟蘿一
濯冠纓一浩歌細細靜涵洙泗脉源源動鼓洛
川波風埃芟子無由入寒玉一泓清更多老我
未除塵俗病欲煩洗雪起沉疴又云白雲封鎖
萬山林卜築幽居深更深養道不于軒冕貴讀
書採取聖賢心何為有大如天地須信無窮自
古今欲鼓遺音絃絕後關閩濂洛待君尋何大
復謂先生于容思先生其始若張橫渠之于范
仲淹其後若蔡元定之于朱紫陽也迨老以父

遊江南歷涉險蹤訪沒于楊子江人皆稱其孝
而又重悲其死云先生初名檜後更蕙或作桂
誤

大器張先生

抑之張氏附

先生名鼎字大器別號自在道人咸寧人父廉
為山西蒲州知州先生少從父之任受學于河
東薛文清公之門用是日勤勵于聖賢之學諸
子百家雖靡不研究而一稟于濂洛關閩之旨
文清公深器重之歸補西安郡庠弟子員景泰
癸酉以易舉于鄉成化丙戌成進士授刑部主
事遷員外郎冰蘖自持推讞詳明甲午出知山
西太原府太原為省會劇郡故稱難治先生游

刃有餘循良弁三晉郡人德之不忍先生離去
故九載攷績晉山西叅政仍署府事又四載始
遷河南按察使振肅紀綱奸貪斂跡嘗辨指揮
董敬等人命之誣弘治改元擢右僉都御史巡
撫保定等府時畿內多事盜賊縱橫于途行旅
戒嚴先生築墻植樹自內丘直達京師由是道
路肅然至今賴之值歲大祲先生給糧賑濟民
免流亡辛亥晉戶部右侍郎尋以病請歸歸四
年為弘治乙卯卒于家年六十有五先生為人

仁厚敬慎事不苟為非義一介不取進退惟命
是聽終身恪守師說不敢少有渝越文清公歿
其文集散漫不傳先生搜輯校正凡數年稿始
克成乃為序梓而傳之至今學者尚論文清必
以先生之言為徵信云所著有仕學日記自在
詩文蠹齋博稿若干卷先生為都憲為亞卿皆
三原王端毅公為冢宰時所推轂其卒也端毅
公銘其墓稱其理學傳自文清公高名可並太
華峰世以為確論時有秦州大叅張公銳字抑

之成化初舉于鄉父敏以國子生為江西布政司照磨公從之任受學東白張先生元禎張先生者豫章名儒也公由是學益有得乙未登進士授刑部主事歷員外郎郎中遷江西吉安知府在吉安政教兼舉士習聿興民用安業坐忤權貴調湖廣漢陽六載以兩郡令舉晉山東左叅政後致仕居鄉日進執經諸弟子于庭講學不倦鄉間薰德焉故隴西學者稱為張夫子可泉胡中丞纘宗稱公誠確溫厚本之天性而多

學好古汲引後進尤為人所不可及云

介菴李先生

仲白李氏附

先生名錦字在中號介菴咸寧人幼警悟不凡
九歲失恃如安成依舅氏韓君智韓為擇師教
之端坐終日不逐群兒嬉讀書知大義日見英
發比成童還為諸生受易于鄉先生董君德昭
之門大肆力于學每試輒為督學使者所稱賞
後遇秦州小泉周廷芳講學得聞周程張朱為
學之要遂棄記誦辭章之習專以主敬窮理為
事又與渭南思菴薛氏咸陽西廓姚氏同邑誼

菴雍氏庶澤講習相勸相規久之踐履醇茂關
中學者咸以橫渠稱之濟南尹恭簡公為通政
時使秦聞先生名延與語大為驚嘆天順壬午
舉于鄉成化戊子遊成均友天下士其學益進
大司成邢公讓深器異之令諸子受業焉後邢
坐事下獄先生倡六館士伏闕抗章明其無
罪雖于事無益而先生之名重京師矣嘗愛武
侯靜以修身儉以養德學湏靜才湏學數語揭
之座右以自警事親色養備至執喪盡禮力絀

異端至今省會士太夫不作浮屠事寔自先生
始為孝廉居憂時巡撫余肅敏公欲延教其子
先生以齊衰不入公門固辭余益重之後余知
其喪不能舉賻以二柳先生卻其一曰不可因
喪射利也郡大夫有與之厚者賻米數十斛以
辭命無俸米字辭後周廷芳復過省與先生印
証所學設問辨難周為嘆服先生解經平正通
達不為鑿說且善誘後學諄諄忘倦出其門者
如李叅政崙劉尚書璣于知州寬董員外養民

及舉人張子渭李盛漸被允深先生數上春官
竟不第成化甲辰謁選直隸松江府同知臧親
戎牒夙夜精勤奸無所售有脫役垂四十載者
先生始發之即令補伍雖權貴居間竟莫能奪
未究厥施以疾卒于官是在成化丙午年僅五
十一貧不能為棺歛其僚友賻之始克歸云先
生性剛介不妄交接不苟為然諾義之所在確
然自信不以一毫挫于人尤重取予所居僅蔽
床席茹淡服䟽雖至屢空終不輕有所取學務

窮理性體之身心不好立言語文字以故歿之日遺稿無存靈寶許襄毅公為先生同志友先生歿十年襄毅公巡撫關中屬督學楊文襄公表其墓文襄公稱先生挺然風塵之表不苟簡遷就與世低昂抱其貞璞卒以完歸而督學虎谷王公亦稱其化如和叔辭章外貧似原思草澤間嗚呼可謂深知先生者矣後數十年而有渭南李仲白氏者名與先生同字仲白號龍坡亦潛心理學為諸生時西蜀龍灣高先生儔署

高陵教事仲白越疆從受學與涇野呂先生同
門相切磋焉正德庚午領鄉薦為宿遷令著勸
農文勸孝文以化俗由是邑多孝子又以脫餘
金買牛給民耕墾荒地宿遷人稱為百年以來
一人遷海州知州致仕初擢州時不能具一花
帶呂先生遺之一圍後去州抵家猶是帶也其
清苦如此嘉靖丙申卒于家呂先生銘其墓稱
其稟受懿嘉學求根本云

思菴薛先生

先生名敬之字顯思號思菴渭南人生有異狀
長大雄偉鬚髯修美左膊一黑文字深入膚裏
生五歲愛讀書十一解屬文賦詩稍長言動必
稱古道則先賢景泰丙子獲藉邑諸生居止端
嚴不同流俗鄉閭驚駭稱之曰薛道學為文說
理而華每為督學使者所賞鑑應試省闈至十
有二次竟不售成化丙戌以積廩充貢入太學
太學生接其言論咸為嘆服一時與陳白沙並

稱由是名動京師自太學歸二尊人相繼歿徒
跣奔葬時大雪盈尺兼漚淺泥濘亦不知避後
遂病足值冬月輒發母嗜韭母歿終身不忍食
韭成化丙午謁選山西應州知州先生治應首
勸民耕稼紡績時當東作循察田野民艱于耕
種者資以牛種民貧負租及不能婚葬者皆助
之買牯畜數十給之糶民令孳息為養又務積
蔬粟不三四歲粟至四萬餘石乾蔬數萬餘斤
尋當饑饉應民免于死亡其既竄而復歸者三

百餘家皆與衣食補葺其屋廬與處由是屬邑
聞風復者沛然又立義塚以瘞流民之死于道
者弘治戊申秋南山有虎患為文祭之旬日間
虎死于壑已酉春蕭家寨北平地有暴水湧出
一寨幾至沉陷先生亦為文祭告水即下洩聲
如雷鳴民免于溺他德政異政多此類詳守谿
王公謨碑記中先生尤雅重學政數至學舍切
切為言孔孟之旨由是應人士始知身心性命
之學奏課第一弘治丙辰陞金華府同知東南

學者如陳聰輩數十人皆樞衣門墻居二年致仕撰金華鄉賢祠志若干卷正德戊辰卒年七十又四先生嗜道若飴老而彌篤好與人講遇人無問人省解不即為說道人或不樂聽說亦不置又好靜坐思索凡有所得如橫渠法即以劄記所著有思菴野錄道學基統洙泗言學錄爾雅便音田疇百咏集歸來藁及演作定心性說諸書其言多有補于名教云其卒也呂文簡公誌其墓略曰初先生致仕家居以事入長安

枏獲遇于長安之開元寺曰邨先生先生言蘭
州軍周蕙者字廷芳躬行孝弟其學近于伊洛
吾執弟子禮事之吾入太學時道經陝州陳雲
達忠信狷介凡事皆持敬遇之吾以為友凡吾
所以有今日者多此二人力也枏謁先生者再
四見先生年已七十日夜讀書不釋卷聽其論
議皆可謦策憤志則亦今日之博學好古死而
後已者也又謂門人胡大器曰為學隆師取友
變化氣質為本渭南有薛敬之從周先生學常

雞鳴而起候門開灑掃設坐及至則跪以請教
又謂門人廉介曰予聞諸思菴薛子曰介菴李
錦關西之豪傑也甘貧守道好學至死不倦今
亡矣夫夫薛子其亦見介菴而興起者乎其學
問淵源如此云

平川王先生

先生名承裕字天宇號平川三原人父恕歷官
太子太保吏部尚書贈太師謚端毅為國朝
名臣第一道德功業載在國史成化元年乙酉
先生生于河南宦邱蓋端毅公巡撫日也端毅
公七子而先生最少方兒時即重厚如老儒恒
端坐不妄言笑七八歲作屋隙詩曰風來梁上
響月到枕邊明又作先師孔子木主朝夕拜之
春秋丁日具香果齋而祭乃為齋銘曰齊不齊

謹當謹萬物安百神統聖賢我古來昭齊不齊
謹當謹太淑人廉知之以白端毅公公喜曰此
兒足繼志矣十四五時在南都從莆田蕭先生
學蕭令侍立三日一無所授先生歸告端毅公
曰蕭先生待兒如此謂不足教耶公曰善哉教
也真汝師矣先生由是益尊師樂學遂深造焉
年十七八著進修筆錄崇仁吳正郎宣序之以
傳年十九應鄉試督學戴公珊試其文哥之丙
午年二十二舉于鄉丁未

孝宗登極召起端毅公為冢宰先生侍行讀書
京邸與一時名公遊由是聞見益廣學益進癸
丑第進士會端毅公致仕先生予告歸乃開門
授徒講學于釋氏之刹堂至不能容復講于弘
道書院先生教以宗程朱以為階梯祖孔顏以
為標準語具督學虎谷王公書院記中蓋先生
以師道自居甚嚴弟子咸知敬學故自樹而成
名者甚衆久之授兵科給事中有時政先務等
疏皆切中時弊兩使藩國饋遺一無所受歷吏

科都給事中正德初逢瑾專政羣工多出其門
先生遠之又上疏乞進君子退小人及諸不法
事瑾怒罰柔三百石輸邊其恨猶未已會先生
以外艱去始免服除瑾誅以原官遷太僕少卿
本寺卿南太常卿時

上南巡先生夙戒牲帛祭品待祀或曰上方用
武無暇于祀焉用備為弗聽及上至奏祀皆
行之言者愧服已卯宸濠叛欲趨南都大臣分
城以守先生分守通濟門乃與家人訣別登城

誓死守之會有逆黨藏甲兵于榔以應賊者先生覺發服以上刑都城肅然壬午

世廟即位改元嘉靖論禦賊功有白金文綺之賜癸未遷戶部右侍郎提督倉場尋回部為世廟所重賜

獻皇帝睿筆清平正直四字丁亥晉南戶部尚書己丑致仕林居十年惟以讀書教人為事當時稱其濟美有范忠宣繼文正公之風論薦者無虛日廟堂方欲召用而先生已歿識者于是

有蒼生之恨云卒年七十有四蓋嘉靖戊戌五月也訃聞賜祭葬如例謚康僖先生性篤孝能悅親養志故端毅公愛之特甚又善事諸兄諸兄皆殊常友之時序祀先唯謹誨諸子姪以道與人交溫乎可親而又栗然不可狎故與之交者咸愛敬焉與長安高御史胤先游久之贈詩以堯夫正叔與之蓋服其和粹嚴正不易及也自少樂多賢友端毅公尤夙以尚友之道誨之故一時海內名賢無弗接者自始學好禮終身

由之故教人以禮為先凡弟子家冠婚喪祭必
令率禮而行又刊布藍田呂氏鄉約鄉儀諸書
俾鄉人由之三原士風民俗至今貞美多先生
之力云所著有論語近說論語蒙讀談錄漫語
星輶集辛巳集考經堂集庚寅集諫垣奏草草
堂語錄三泉堂漫錄厚鄉錄童子吟藁婚禮用
中進修筆錄動靜圖說等書所述有橫渠遺書
太師端毅公遺事等書行世門人馬光祿理秦
大叅偉郝大叅世家雒中丞昂張給諫原李憲

副伸趙僉憲瀛秦明府寧王明府佩李孝廉結
有名光祿別有傳

關學編卷四

朝邑

趙蒲廷璧重刻
李元春時齋續編

三原

劉映菁毓英補刻
外孫王吉甫校

明

涇野呂先生

先生名桷字仲木高陵人世居涇水北自號涇
野學者尊之曰涇野先生父溥號渭陽有隱德
先生少雋悟絕人羈州為諸生受尚書于高學
諭儔邑人孫大行昂即有志聖賢之學又問道

于渭南薛思菴氏克乎有得不妄語不苟交夙
夜居一矮屋危坐誦讀雖炎暑不廢衣冠年十
七八夢明道程子東萊呂氏就正所學由是學
益進督學邃菴楊公虎谷王公拔入正學書院
與羣俊茂游大叅熊公李公延教其子先生辭
不獲乃館于開元寺後聞父疾即徒步歸二公
以夫馬追送不及先生曰親在床褥安忍俟乘
為也父尋愈搆雲槐精舍聚徒誨學其中二公
仍遣子熊慶浩李繼祖卒業焉弘治辛酉舉于

鄉明年計偕不第遊成均與三原馬伯循秦世
觀榆次寇子惇安陽張仲修崔仲鳧林縣馬敬
臣諸同志講學寶邛寺嘗約曰文必載道行必
顧言毋徒舉業以要利祿毋徒任重弗克有終
曰孜孜惟以古聖賢進德修業為事遣弟栖師
事伯循其入學儀式京師傳以為法同邑高朝
用時為地官郎謂檢討王敬夫曰予邑有顏子
子知之乎敬夫曰豈呂仲木耶自是納為厚交
乙丑

敬皇帝賓天與諸生哭臨先生聲出淚下衆譁
為迂弗恤也孫行人歿于京遺孤不在側先生
哀經哭拜弔者或曰禮與曰禮喪無主比隣為
主况師乎及返葬于鄉猶是服也宿館下三日
哭而相葬事既歸復講學于精舍從遊者日衆
正德戊辰舉南宮第六人

廷對擢第一授翰林修撰凡知先生者皆喜曰
今得真狀元矣時閹瑾竊政以杉榆故致賀先
生却之瑾銜甚自是遜避不與往來在翰林二

年操介益勵祿入祇祀其先父母書問至必再
拜使者受之退而跪讀期功喪為位而哭門無
饋遺時何粹夫瑋為編修以道自守不為流俗
所喜先生日相切劘驩如也會西夏搆亂疏請
上入宮御經筵親政事不報瑾惡其言益啗甚
乃與粹夫相繼引去未幾瑾敗禍延朝紳人咸
服先生之明家居杜門謝客者三年臺省交章
薦其往拒逆瑾卓識偉節宜召擢大用壬申起
供舊職上疏勸學謂文王緝熙敬止咸和萬民

斯享靈囿之樂元順帝廢學縱欲盛有臺沼我
太祖代取之人主可不深念或謂元主之戒傷
于太直先生曰賈山借秦為喻漢文尚能用之
况

主上過漢文遠甚柟獨不能為賈山乎疏入

上亦嘉納未幾乾清宮災復應詔言六事一曰
逐日臨朝聽政二曰還處宮寢預圖儲貳三曰
郊社禘嘗祗肅欽承四曰日朝兩宮承顏順志
五曰遣去義子畚僧邊軍令各寧業六曰天下

鎮守中官貪婪取回別用不報先生復引疾去
崔仲鳧嘆曰古有直躬進退不失其道者吾于
呂仲木見之矣歸而卜築邑東門外扁曰東郭
別墅四方學者日集都御史虎谷王公薦其學
行高古乞代已任不報渭陽公病先生侍湯藥
晝夜衣不解帶履恒無聲如是一年鬚髮為白
比卒哀毀踰禮既葬廬墓側旦夕焚香號泣門
人感之皆隨先生居乃與平定李應箕同邑楊
九儀輩講古今喪禮當襄事時郡守致賻受之

既而馳幣勾文辭門人問故先生曰方卒哭而遽懷金為文吾不忍也既禫釋復講學于別墅遠方從者彌衆別墅不能容又築東林書屋居焉鎮守閹廖餽以豚米却之廖素張甚乃戒使者曰凡過高陵毋擾有吕公在也有客以兼金乞居間先生笑而謝曰人心如青天白日乃以鳥獸視耶其人慙曰吾姑試子耳門遽蕭然無異寒素

世廟即位詔起原官時朝鮮國奏稱狀元吕柟

主事馬理為中國人才第一朝廷宜加厚遇仍
乞頒賜其文使本國為式其為外夷敬慕如此
上御經筵先生進講迄值

仁祖淳皇后忌辰口奏宜存襟服禮罷賜酒饌
朝論躡之癸未分校禮闈取李舜臣輩悉名士
時陽明先生講學東南當路某深嫉之主試者
以道學發策有焚書禁學之議先生力辨而扶
救之得不行場中一士子對策欲將今宗陸辨
朱者誅其人火其書極肆詆毀甚合問目意且

經書論表俱可同事者欲取之先生曰觀此人
今日迎合主司他日必迎合權勢同事者深以
為然遂置之念

新天子即位上疏請講聖學畧曰學貴于力行
而知要故慎獨克己上對天心親賢遠讒下通
民志天下中興太平之業寔在于此不報在史
館與鄒東廓友善甲申奉修省 詔復以十三

事上言頗過切直時東廓亦上封事同下詔獄
一時直聲震天下人人有真鐵漢之稱尋謫東

鄺判廣德先生判解州道出上黨隱士仇欄兄
弟遮道問學有梓匠張提者役于仇氏聞先生
講喜甚跼而求教先生誨以善言提大悟昔嘗
取人一木作界方至是遂還其主仇氏兄弟益
為感動先生喜形諸詩云豈有征夫能過化雄
山村裏似堯時既至解仰堯舜故址慨然以作
士變俗為已任解士子視聖學與舉業為二先
生曰苟知舉業聖學為一則干祿念輕救世意
重于是講學崇寧宮每誨諸士雖舉業拳拳不

離聖賢之學諸士皆欣然向道以為聖賢復出
也會守缺先生攝事不以遷客自解免恤貶減
役勸農課桑築堤以護塩池開渠以興水利善
政犁然郡庠士及四方來學者益衆乃建解梁
書院居之選少而俊秀者歌詩習小學諸儀朝
望令耆德者講會典行鄉約廉孝弟節義者表
其間求子夏後教之學建溫公祠正夷齊墓訂
雲長集久之政舉化行俗用丕變丁亥轉南吏
部考功郎中解梁門人王光祖謂先生在解三

年未嘗言及朝廷事為考功躬親吏牘少司馬
王浚川薦其性行淳篤學問淵粹遷南尚寶卿
久之遷南太常少卿往太常讌樂甚褻先生悉
草之乙未遷國子祭酒先生在南都幾九載海
內學者大集初講于柳灣精舍既講于鷺峰東
所後又講于太常南所風動江南環向而聽者
前後幾千餘人閩中林穎浙中王健以謁選行
中途聞先生風遂止乃買舟泛江從之遊上黨
仇欄不遠數千里復來受學先生猶日請益于

甘泉湛先生日切琢于鄒東廓穆玄菴顧東橋
諸君子時東廓亦由廣德移南蓋相得甚驩云
其在國學益以師道自任自講期外尤日進諸
生諄諄發明使人人知聖人可學而至嘗取儀
禮諸篇令按圖習之登降俛仰鍾鼓管籥洋然
改觀易聽有以孝廉著者揭榜示旌喪者弔而
賻病者問而醫死者哭而歸骸其鄉又奏減厯
以通淹滯絕請托以杜幸門凡監規之久弛者
罔不畢舉六館僚屬觀法清慎諸生皆循循雅

飭一時太學有古辟雍之風京邸搢紳多執弟子禮從學而內使大興沈東亦時時聽講焉甚感人如此人人稱為真祭酒臺臣張景薦其德行文學真海內碩儒當代師表丙申晉南禮部右侍郎東南學者喜先生復至益日納履其門乃復講于禮部南所時

上將躬視承天山陵累疏勸止不報署南吏曹篆疏薦何瑋穆孔暉徐階唐順之等二十人入賀會有論湛先生偽學者先生白諸當路曰

聖皇在上賢相輔之豈可使明時有學禁之舉乎事遂已時霍文敏為南宗伯與夏貴溪故有隙時時囑詎夏先生乘間諷曰大臣誼當和衷過規之可也背憎非體霍誤疑先生黨夏已先生來闕下夏已柄國數短霍于先生先生毅然曰霍君性雖少褊故天下才也公為相當為國惜才由是夏亦誤疑先生黨霍會廟災自陳遂致仕然先生終未嘗以此向人自白也歸而講學北泉精舍越四年壬寅七月初一日卒

距生成化己亥四月二十一日年六十有四卒
之日高陵人為罷市休寧門人胡大器先至高
陵侍疾遂視殮殯而執喪焉四方門人聞者皆
為位而哭先生性至孝友儉朴事繼母侯色養
篤至室無妾媵與李淑人相敬如賓事叔父博
如父歲饑嘗分俸贖其族衆姊劉家窶甚時時
濟之憫外祖宋乏嗣每展墓流涕從舅瑾寓同
州特訪迓歸平生未嘗干謁人亦不受人干謁
不事生產既歿家無長物蓋先生之學以立志

為先慎獨為要忠信為本格致為功而一準之
以禮重躬行不事口耳平居端嚴恪毅接人則
和易可親至義理所執則鏗然兢烈置死生利
害弗顧也嘗訪王心齋艮于泰州趙玉泉初于
黎城每遇同志雖深夜必往訪苟非其人即一
刻不輕投教人曰材造就總之以安貧改過為
言不為玄虛高遠之論門人侍數十年未嘗見
有偷語惰容論者謂關中之學自橫渠張子後
惟先生為集大成云所著有四書曰問周易說

翼尚書說要毛詩說序春秋說志禮問內篇外
篇宋四子抄釋史館獻納南省奏稿詩樂圖譜
史約高陵志解州志及涇野文集別集傳世隆
慶初贈禮部尚書謚文簡

谿田馬先生

先生名理字伯循號谿田三原人弘治戊午舉人正德甲戌進士皆高等初授吏部稽勲司主事尋調文選甫一年即謝病歸戊寅薦起考功庚辰又送母歸嘉靖甲申復薦起稽勲員外郎尋遷稽勲考功郎中丁亥擢南京通政司右通政戊子又謝病歸辛卯復薦起光祿寺卿甫一年又謝病歸十年又薦起南京光祿卿至即引年致仕乙卯年八十又二其年十二月十二

日夜地大震先生即以是夜卒人皆慟之先生
幼敏慧醇雅如成人年十四為邑諸生即稱說
先王則古昔研究五經指義多出人意表弘治
癸丑先生年二十矣會王端毅公致仕康僖公
以進士侍歸講學弘道書院先生即受誨康僖
公所于是得習聞國朝典故與諸儒之學先生
一切體驗于身心與同門友秦西澗偉作告文
告先師共為反身循理之學以曾子三省顏子
四勿為約進退容止力追古道康僖公深器異

之一時學者即以為今之橫渠也遂菴楊公督學關中見先生與康德涵呂仲木大驚曰康之文辭馬呂之經學皆天下士也是時身未出里中而名已傳海內動京師矣既如京益與海內諸名公講學其意見最合者則陳雲達呂仲木崔仲鳧何粹夫羅整菴諸君子于是學日純名日起所在學者多從之遊督學漁石唐公為建嵯峨精舍漁石作記稱先生得關洛真傳為當今碩儒四方學徒就講者益衆其教以主敬窮

理為主士無問少長與及門不及門無不聞風
傾慕者先生又特好古儀禮時自習其節度至
冠婚喪祭禮則取司馬溫公朱文公與大明集
禮折衷用之處父喪與嫡生母之喪關中傳以
為訓乃其難進易退之節人尤以為不可及嘗
曰身可絀道不可絀見行可之仕惟孔子能之
下此者須自揣分量可也仲鳧稱先生愛道甚
于愛官當世以為確論往安南貢使謂部郎黃
清曰故聞馬先生名願一見今不在仕列何也

黃曰先生高志不欲官使人嘉嘆以去朝鮮國
王奏乞頒賜主事馬某文使本國傳誦為式其
名重外夷若此先生主事時上書諫
武宗巡遊者二後伏闕諍益力杖于
廷員外
時值議大禮率百官伏闕進諫

世宗震怒命開伏闕者姓名百官以先生名為
首逮繫詔獄復杖于廷尋復官郎中時奏寢莊
禪之奏即執政言亦不從考察力罷致政私人

彭澤

廣東人

力主被劾調用魏校蕭鳴鳳為正人卒

不改官公論翕然至今稱為真考功嘉靖丙戌
分校禮闈所取皆海內名士人尤服其藻鑑先
生喜接人又喜汲引後生年七十歸隱商山書
院名益重來學者遠近踵集縉紳過訪與海內
求詩文者無虛日先生疊疊應之不倦山中野
服鶴髮童顏飄然望之若仙人以是益願侍先
生談諸得詩文者又願得先生親書先生不談
佛老不觀非聖書初年介而毅方大以直至晚
年則益恭而和直諒而有容其執禮如橫渠其

論學歸準于程朱然亦時與諸儒異同蓋自有
獨得之見云所著四書註疏周易贊義尚書疏
義詩經刪義周禮註解春秋修義陝西通志與
詩文集各若干卷隆慶間追贈副都御史賜祭
奠先生門人最盛有河州何永達字成章自號
拙菴以歲貢為清豐縣丞尋棄去讀書講學老
而彌篤壽九十有四著春秋井鑑林泉偶得聖
訓補註井鑑續編諸書先生嘗寄以詩云楊柳
灣頭撫七絃故人零落似飛綿河濱尚有鍾期

在青爲音來動隔年其見重如此

苑洛韓先生

先生名邦奇字汝節號苑洛朝邑人父紹宗號蓮峰成化戊戌進士仕至福建按察副使學識才品當世推重先生幼靈俊異常承訓過庭即有志聖學為諸生治尚書時即著蔡傳發明禹貢詳略律呂直解見者驚服弘治甲子以書舉第二人正德戊辰成進士拜吏部考功主事尋轉員外郎辛未考察都御史某私袖小帙竊視先生曰考覈公事有公籍在何以私帙為乃奪

其帙封貯不檢都御史為遜謝衆皆失色調文
選太宰托意為官擇人欲發視缺封先生執不
可太宰銜之會京師地震上䟽極論時政闕失
謫平陽通判甲戌遷浙江按察僉事時逆廝錢
寧以鈔數萬符浙易銀當事者歛餽恐後先生
檄知縣吉棠散其歛卒不餽宸濠將舉逆先命
內堅假飯僧數千人于杭天竺寺先生立為散
遣濠又以儀賓託名進貢假道衢州先生召儀
賓詰曰進貢自當沿江而下奚自假道歸語爾

主韓僉事在此不可誑也後二年濠果通鎮守
欲襲浙江賴前事發姦不竟逞先生謂鎮守為
浙蟲諸不少假鎮守銜甚誣奏擅革進貢誹謗
朝廷逮下詔獄為民既歸謝密誦學四方學者
負笈日衆

世廟即位改元嘉靖詔起山東叅議尋乞休甲
申大同巡撫張文錦階亂遇害時勢孔棘復以
薦起山西左叅議分守大同人皆危之先生聞
命即行將入城去二舍許逆者使二人露刃迎

且故燬叅將宅以懾之先生奮然單車入時諸
司無官鎮人聞先生入皆感激泣下人心少安
既而巡撫蔡公天佑至代州先生親率將領令
盛裝戎服謁蔡于代蔡驚曰公何為如此先生
曰某豈過于奉上者大同變後巡撫之威削甚
大同人止知有某耳不身先降禮何以帥衆蔡
為嘆服會

上遣戶部侍郎胡公瓚提兵問罪鎮人聞之復
大譟先生迓侍郎于天城以處分事宜馳白燧

撫諸軍聞言出于先生信之始解翌日首惡就戮先生謂侍郎曰首惡既獲宜速給賞以示信庶亂可弭寧不然人心疑懼将有他變侍郎不聽先生遂致仕歸後果如其言戊子起四川提學副使尋改右春坊右庶子兼翰林院修撰其秋主試順天因命題為執政所不悅嗾言者謫南太僕寺丞己丑再疏歸尋起山東按察副使大理左少卿以左僉都御史巡撫宣府時大同再變王師出討百凡軍需倚辦宣府悉力經理

有備無乏乙未入佐院事尋改巡撫山西時羽
檄交馳先生躬歷塞外增飭戰守之具拓老營
堡城垣募軍常守以代分番諸邊屹然可恃四
䟽乞休復致仕甲辰復用薦起總理河道陞刑
部右侍郎改吏部右侍郎太宰周公用喜得佐
理翁然委重丁未陞南京都察院右都御史復
進南京兵部尚書叅贊機務五䟽乞歸是在己
酉益修舊業倡導來學居七年乙卯會地震卒
年七十七贈少保謚恭簡門人白壁曰先生天

稟高明學問精到明于數學胸次灑落大類邵
堯夫而論道體乃獨取張橫渠少負氣節既乃
不欲為奇節一行而識度汪然涵養宏深持守
堅定躬行心得中正明達則又一辟敬軒也所
著有苑洛語錄苑洛集苑洛志樂性理三解易
占經緯易說書說毛詩未喻諸書傳世弟邦靖
字汝慶號五泉幼稱奇童年十四舉于鄉二十
一與先生同第進士為工部主事權稅武林北
及瓜有同年趙司李以屈安人病無子買女婢

遺之拒不受趙曰此越女有色者笑曰政恐若
此耳既遷郎中以建言逮獄為民嘉靖改元起
山西左叅議以病免尋卒年僅三十有六汝慶
父子兄弟以學問相為師友太史王敬夫銘其
墓稱為曠世之英全德之士所著有五泉集朝
邑志若干卷

宜川劉先生 補

先生名璽

宜川人賦性端

方博覽羣書與兄琛同舉宏

治己卯鄉試人以公輔期之琛登進士任推官
歷按察僉事而璽方以道學自任不急進趨徒
家長安教授諸生人爭師事之關中以理學名
者多出其門馮從吾璽外孫也少時璽口授五
經昕夕誨育竟傳其學後璽官衛輝通判有廉
名兄琰成化辛卯舉人知汝陽稱循吏而琛居
官所至多政績長安稱三劉

瑞泉南先生

雲林尚氏附

先生名大吉字元善號瑞泉渭南人正德庚午
舉人辛未進士授戶部主事歷員外郎郎中浙
江紹興府知府致仕嘉靖辛丑卒年五十有五
先生幼穎敏絕倫稍長讀書為文即知求聖賢
之學嘗賦詩言懷有誰謂予嬰小忽焉十五齡
獨念前賢訓堯舜皆可并之語弱冠以古文辭
鳴世入仕尚友講學漸棄其辭章之習志于聖
道然猶豪曠不拘小節嘉靖癸未如紹興時王

文成公倡道東南講致良知之學王公乃先生
辛未座主也先生既從王公學得實踐致力肯
綮處乃太悟曰人心果自有聖賢也奚必他求
于是時時就王公請益焉嘗曰大吉臨政多
過先生何無一言王公曰何過先生歷數其事
王公曰吾言之矣先生曰何曰吾不言何以知
之曰良知自知之王公曰良知却是我言先生
笑謝而去居數日復自數過加密來告曰與其
過後悔改不若預言無犯為佳也王公曰人言

不如自悔之真先生笑謝而去居數日復自數
過益密曰身過可勉心過奈何王公曰昔鏡未
開可得藏垢今鏡明矣一塵之落自難住脚此
正入聖之機也勉之先生謝別而去于是闢稽
山書院聚八邑彥士身率講習以督之而王公
之門人日益進已又同諸同門錄王公語為傳
習錄序刻以傳越丙戌先生入覲以考察罷官
先生治郡以循良重一時當事者以抑王公故
故斥之先生致書王公千數百言勤勤懇懇惟

以得聞道為喜急問學為事恐卒不得為聖人
為憂略無一字及于得喪榮辱之間王公讀之
嘆曰此非真有朝聞夕死之志者未易以涉斯
境也同門遞觀傳誦相與嘆仰歆服因而興起
者甚多王公報書為論良知旨甚迷謂關中白
橫渠後今實自南元善始先生既歸益以道自
任尋溫舊學不輟以書抵其侶馬西玄諸君聞
明致良知之學構渭西書院以教四方來學之
士其示弟及諸門人詩有云昔我在英齡駕車

詞賦塲朝夕工步驟追踪班與揚中歲遇達人
授我大道方歸來三秦地墜緒何茫茫前訪周
公跡後竊橫渠芳願言偕數子教學此相將而
尤惓惓于慎獨改過之訓故出其門者多所成
立蓋先生之學以致良知為宗旨以慎獨改過
為致知工夫飭躬勵行惇倫叙理非世儒矜解
悟而略檢柙者可比故至今稱王公高第弟子
必稱渭南南元善云所著有紹興志渭南志瑞
泉集若干卷行于世時有同州尚公班爵字宗

周弘治甲子經魁父衡為浙江叅議公隨父任
亦從王文成公學後任安居知縣谿田先生謨
通誌稱公作縣剏果勤勵政舉民安著有小淨
稿雲林集

斛山楊先生

先生名爵字伯修號斛山富平人初誕時室中
如火光起人咸驚異之長美姿容身滿七尺家
故貧年二十始發篋讀書苦無繼晷資嘗以薪
代夙夜攻苦每之隴上耕即挾冊往意欣欣也
居恒念人當以聖賢為師一切不稟古昔何所
稱宇宙間兄靖以掾誤罹法先生獨步百里外
申厥冤遂並繫獄先生從獄中上書辭意激烈
邑令見而驚之曰奇士也胡累至是耶立出之

給油薪費督之學年二十八聞朝邑韓恭簡公
講理學躬輦米往拜其門公睇先生貌行行壯
也欲卻之父蓮峰老人謂曰意若非凡人數日
叩其學詫曰縱宿學老儒莫是過吾幾失人矣
既省語言踐履錚錚多古人節嘆曰畏友也同
門學者皆自以為不及後與楊椒山稱韓門二
楊云年踰三十督學漁石唐公始首拔為邑諸
生嘉靖戊子秋應試長安就食食館客有遺金
者先生守之客至持館人急先生詰其實付以

金容謝寡取先生峻不允乃敦請家止宿焉是
秋即以書舉第三名明年成進士授行人三使
藩國餽贈俱讓不受或以為矯先生曰彼雖禮
來名重 天子使吾獨不自重 天子使邪聞
者嘆服壬辰選山東道監察御史時權臣當國
草疏將劾之疏且具會鄉人有以垂白在堂勸
止者乃移疾歸歸未幾母歿毀瘠踰禮廬墓三
年有冬笋馴兔之瑞服闋家居授徒講學者又
五年庚子秋以薦起河南道巡視南城權貴歛

避而所覩時事不勝扼腕辛丑春二月初四日
上封事娓娓數千言大約天下事內而腹心外
而百骸皆受病足以失人心而致危亂者五一
則輔臣夏言習為欺罔翊國公郭勛為國巨蠹
所當急去二則凍餒民閔不憂恤而為方士修
雷壇三則大小臣工弗覩朝儀宜懃其望四則
名器濫及緇黃出入大內非制五則言事諸臣
若楊最羅洪先輩非死即斥去所損國體不小
是時中外頗以言為諱疏入人皆愕然

上大怒即逮繫鎮撫司窮究其詞拷掠備至先生一無詘是日都城風大作人面不相覩鄰人呼為楊御史風其感動天地如此先生身晝夜梏鎖中創甚血淋漓下死而復甦先是士大夫下獄並未有梏鎖者乃自先生始蓋貴溪翊國意也戶部主事周公天佐巡按陝西御史浦公鉉相繼申救俱箠死獄中守益戒嚴人益為先生危而先生處之自若刑部郎錢公德洪工部郎劉公魁吏科給事中周公怡皆先生同志舊

友先後俱以事下獄相得甚驩然自學問相勸
勉外各相戒不得言得罪事錢先釋獄先生願
有以為別錢曰靜中收攝精神勿使遊放則心
體湛一高明廣大可馴致矣古人作聖之功其
在此乎先生敬識之而乃日與周劉切劘修詣
不少輟繹四子諸經百家研精於易著周易辨
錄及中庸解若干卷諸所著作畧無憤惋不平
語詩文倡和身世頓忘如是者五年乙巳秋八

月十二日

上以受釐故放先生及周劉歸田里而三人者
猶相與取道潞水講學舟中逾臨清始別歸會
熊太宰以諫仙箕忤旨復逮三人獄先生抵家
甫十日聞命即日就道親朋揮淚為別先生無
幾微見顏面身幽圜扉者又三年丁未冬十一
月五日

上建醮高玄殿災火圍中恍聞呼三人名氏者
次日釋歸為民

上之聖明保全諫臣如此既歸教授里中貴人

莫得見其面疏粥敕履怡然自適己酉冬十月
九日卒于家年五十有七病革時援筆自誌又
惓惓以作第一等事做第一等人教其子孫無
他辭蓋先生為人硜直不阿而內實忠淳自少
至老孳孳學問以韓范洛馬谿田為師以楊椒
山周訥溪劉晴川錢緒山蔡汝濱諸君子為友
險夷如一初終不貳磨礪精光展拓胸次其所
涵養者誠深以故鼎鑊湯火百折不回完名全
節鏗錡一代不偶也彼世之淺衷寡蓄耽耽以

氣節自多者視先生當媿死矣先生沒若干年
莊皇帝以

世廟遺詔贈光祿少卿錄其後

今上用禮官議謚忠介

愧軒呂先生

石谷張氏

正立李氏附

先生名潛字時見涇陽人號愧軒嘗謂為學必
不愧屋漏方可為人因取號以自警云父應祥
嘉靖壬辰進士為禮科都給事中以論宮寮事
奪官為時名臣先生幼穎敏讀書即解大義嘗
秘書克己銘懷袖中時為展玩稍長從都諫公
任師事蜀進士趙本溪氏聞本溪氏講義理之
學而悅于是學甚力歸又師事涇野呂先生深
幸其得所依飯凡一言一動率以涇野為法于

是學益力而舉子業亦益入理為邑諸生試每
傾曹偶學使者重其文行拔入正學書院以風
多士嘉靖丙午以詩薦鄉書卒業成均友天下
士而名日起時朝紳中有講學會每聞先生
偕計至亟延之講先生刻意躬行遠聲色慎取
予一毫不苟而尤嚴于禮諸冠婚喪祭咸遵文
公惟謹即置冠與祭器式必如古人或以為迂
弗恤也先是母栢孺人病于京先生扶母病西
歸劑醫百至孺人病革以先生且弱冠命之娶

先生娶而不婚日夜苦處喪次既襄事廬居墓
所服除乃始婚事至孝之名動關中事都諫公
與繼母張曲盡孝養都諫公病至嘗糞以驗歿
則哀毀幾絕都諫公封事故未留稿先生走
闕下錄原疏請銘焉文莊公文莊公亟稱之事
叔父待諸弟情愛備至每歲時祭畢燕諸族人
講明家訓又率鄉人行鄉約人多化之親黨有
窘乏輒憐而周焉與人交平易款洽或有過即
面規之而未嘗背言其短嘗與友人蒙泉郭公

先生講學京師通州距京師甚邇公從之游湛
先生教以隨處體認天理公大有省無何通州
公致仕公歸而補邑諸生復受學涇野先生為
諸生四十餘年竟厄于塲屋以積廩行將膺貢
嘆曰吾老矣安用貢為乃上書督學劉公辭廩
劉公雅知公學行特加禮遇仍扁其門曰清風
高節尋奉例遙授訓導職銜云公為人方正介
直涇野先生深器重之嘗贈以詩有守道不回
此舊堅之句生平不妄交遊獨與愧軒蒙泉諸

君子相講切日坐南園草屋中讀書窮理涵養
本原至老不倦即惡衣糲食澹如也嘗語學者
曰先儒有云默坐澄心體認天理又云靜中養
出端倪吾輩湏理會得此方知一貫真境不爾
縱事事求合于道終難湊泊不成片段矣人皆
以為名言卒于萬曆壬午壽八十貧不能葬李
敏肅公捐金助之始克襄事云挺字正立咸寧
人正嘉間西安郡學生性孤直有義氣不隨時
頗仰會有 詔藩郡如故事出諸生分諭諸屬

公以次出某邑贈遺一無所受嘗自誦曰生湏
肩大事選用讀春秋涇野先生坊又講學谿田
馬先生所往來三原路中以盜死人皆惜之

蒙泉郭先生

先生名郭字惟藩號蒙泉涇陽人器宇凝重
時屹若成人甫八齡即知誦讀諳聲律時從都
諫龍山呂公學偶試以對句云曉風拂水面先
生輒應聲曰朝日射岩頭龍山公計偕屬受學
東橋李公與龍山公子愧軒先生同筆研兩人
同肆力于學即以聖賢相期許曰必不為世俗
碌碌者補邑庠生聲名蔚起父母相繼逝先生
侍疾居喪竭力盡瘁家計窘甚而處之裕如朝

夕攻苦益潛心性命不顯顯競雕蟲之技時蓋
未離庠校而名已張三輔矣邑侯樊高其行延
居講席或有以千金求居間者先生峻拒不納
樊侯退而省其私益用高之嘉靖戊午年已四
十有一矣始舉于鄉辛酉冬以呂師會葬遂不
上公車一時郡邑爭表其廬謂得古師弟之誼
焉先生舉孝廉後猶與愧軒先生讀書龍岩洞
中學益有得負笈從遊者甚衆累試春官不第
乙丑謁選河南獲嘉學諭日與諸生講學課藝

多所造就隆慶庚午擢國子助教值馬文莊公
為祭酒教規肅然先生贊襄之力居多時年已
五十有六例不得入臺省同列欲先生少隱庚
甲應選先生笑曰臺省寧可不得年其可隱邪
僅得戶部主事朝論偉之權稅九江先生處脂
潤燭然不滓弊剔奸鋤商旅胥悅時有監關郡
倖某者墨吏也束于新令不得肆乃妄加污蔑
事聞諸朝朝大夫共知先生賢竟為白其誣萬
曆庚辰出守馬瑚馬瑚西南夷故地俗陋易囂

先生恩威並濟禮讓躬先裸夷數十輩從其譯
酋願望見先生顏色歸而愛戴彌切居未三載
聞有猶子之戚念伯兄且老獨居遂投牒歸歸
田二十餘年自讀書講學外他無所事督學啟
菴許先生雅重先生檄縣延為鄉飲大賓先生
雖堅遜恒虛席以待乙巳六月三日無疾而卒
距生正德戊寅三月十二日享年八十有八士
大夫及門下士追思無已以其德履私謚曰貞
懿先生先生學重根本篤于倫理而兢兢持敬

自少至老一步不肯屑越暇中喜吟詩卓有堯
夫擊壤遺意有云學道全憑敬作箴湏臾離敬
道難尋常從獨木橋邊過惟願無忘此際心又
云近名終喪已無欲自通神識遠乾坤濶心空
意見新閉門只靜坐自是出風塵又云莫道老
來積德難古人雖老志不朽富公八十尚書屏
武公九十猶求友老來聞道未為遲錯過一生
寧不悞從此努力惜分陰毋徒碌碌空白首觀
此則知先生享上壽而完名全節非偶然矣先

生與人言每依大節而出之藹然可聽令人不忍別去雖新進少年延見必恪坐平手不釋卷冠履几榻悉列箴銘而晚年尤喜讀易所著有自警俚語山居雜詠語畧族譜仰鄭堂集仲子九有殺青以傳九有乙未進士以猗氏令擢禮部主事未究其用而卒人皆惜之

秦關王先生

先生名之士字欲立號秦關學者稱秦關先生
其先咸寧人五世祖志和遷居藍田其後子孫
因家焉父旌號飛泉官代邱教授明理學有語
錄藏于家先生幼承進訓七八歲即知學教授
公授之毛詩二南輒解輒為諸弟妹誦之教授
公喜有子後治大戴禮兼通易為諸生以文名
庠校間嘉靖戊午舉于鄉己未試春官不第由
是益肆力舉業者累年後屢不第幡然改曰所

性分定聖道遠人乎哉一曲經生華藻奚為遂
屏棄帖括潛心理窟毅然以道學自任為養心
圖定氣說書之座右閉關不出者九年蒿牀糲
食尚友千古行已必恭與人必敬飲食必祭必
誠兢兢遵守孔氏家法一時學者以為藍田呂
氏復出感慕執經者屨滿戶外士習翕然又謂
居鄉不能善俗如先正和叔何乃立鄉約為十
二會赴會者百餘人設科勸糾身先不倦諸灑
掃應對冠婚喪祭禮久廢每率諸宗族弟子一

一敦行之于是藍田美俗復興萬曆甲戌病痺
屬又哭母過毀步履愈艱終喪而嚮道之心愈
篤謂非博取遠遊終難進道會仲子守亦與偕
計己卯遂復如京是時先生已久謝公車第日
與諸同志講學都門之蕭寺崇正闢邪力肩斯
道即時貴或譚及二氏輒正辭距之不少假既
而道鄒魯瞻闕里徧拜先師及諸賢祠墓低回
留之不忍去夢寐如見其人久之始歸由是秦
關之名動海內矣凡縉紳莅茲道茲者罔不式

廬願見表厥宅里云歲乙酉德清許敬菴先生
督關中學講學正學書院先生故許亢生同志
友也禮徵先生為多士式先生亦樂就許先生
合志同方相為切劘時多士皆有所興起後許
先生以應天丞謫歸先生亦南遊講學出武關
浮江漢而下迂道江之右會南昌章子潢新城
鄧子元錫廣信衢州楊子時喬殷子士望復東
渡浙水見許先生于德清東南學者聞先生亡
多從之遊先生二子宗容念先生疾客以肅迎

歸是在己丑秋明年庚寅八月卒於家壽六十
有三目欲瞑以手示二子為訣亦魯子啓手足
意也先是南司城趙公用賢柱史王公以通相
繼疏薦趙疏海內三逸公居其一疏云孝弟力
田行不踰乎軌範詩書敦悅名已動于鄉閭雖
久嬰足疾而過廬者必式宜如近王敬臣故事
授以京秩俾表帥一鄉矜式後學便柱史疏大
略與趙符

命下宗伯議議如薦者指先生為孝廉垂三十

餘年竟不仕角巾野服悠焉終老至是

詔授國子監博士除目至而先生已先物故四
越月一命不待君子惜之先生生平修姱惇倫
篤於行誼丁內外艱毀幾滅性處兄弟怡怡未
五旬失耦誓不繼鰥居終身其于世俗聲色嗜
好一切漠然性不問家而好施喜活人或謂貧
所濟幾何則曰吾盡吾心力耳置祠祭墓祭二
田為宗族置義倉義田即楹畷無多寔貧士所
難居恒晦迹却掃即郡邑以幣交未嘗苟受亦

未嘗輕謁至于訪道求友雖跋涉間關數千里
亦不憚遠云先生篤信好學見徹本原非沾沾
矜一節一善以成名者世或止以甘貧苦節稱
先生是豈足盡先生哉所著有理學緒言信學
私言大易圖象卷道學考源錄易傳詩傳正世
要言正俗鄉約王氏族譜正學筌蹄闕里瞻思
關洛集京途集南遊稿所述有先師遺訓先君
遺訓 皇明四大家要言性理類言續孟錄諸
書行世

今

亦不單盡二生黨計致學見熾本京非亦

未嘗陣臨至千請直來文艱難越間關幾千里

以聘劉先生補

先生名儒中部人中部劉氏為邑世族先生
父聰成化丁未進士官左僉都御史巡撫順
父璋舉人官南和令陞知霸州皆著名德顯績
兄仕正德辛巳進士官主事爭興獻禮廷杖不
死久之起為員外郎歷郎中旋以劾武定侯郭
勛又受廷杖謫柳州穆宗即位以遺詔起大僕
少卿謝病不就從兄弟佐進士官戶部主事侃仁
倅俱舉人倅知聞喜石州並不愧家聲先生性

至孝父嘗倉卒被盜先生與兄自外踰垣入爭求代盜義之釋其父嘉靖間以舉人令安邑補完縣陞叙州同知所至有惠政遷慶藩左長史以禮繩王王不聽遂致仕歸為學以誠一為本辨析理義毫忽不苟子史百家言無所不通顧一折衷於程朱學者爭師事之先生正己率物危坐竟夕衣冠必整膚施楊大保兆出其門既貴每見猶侍立終日語人曰吾侍兩宮未若先生嚴生平不近倡俳雖賓祭亦弗接於前著有

邑志橋麓集劉氏家禮子光文以明經知招遠
擢判真定有井出金內官監採為民害奏劾罷
其事一時權貴憚之

其事一却鄭貴卿之

鄴侯真家育其出金內官盟結為月害奏

出悉辭蘇集隱內陳豎子失文以

伯明劉先生

補

弟子誠附

先生名子誠宜川人幼有至性潛心書史嘉靖
時舉於鄉與溫恭毅砥行明經一時老師宿儒
翕然宗之先生為學既綜六經又精羣經尤於
周子圖說通書抽得抽開啟鑰之妙每上公車考東
觀遺闕選俗異語者三十年己丑為楊起元擬
元與他房陶望齡爭或因北卷欲置第二楊不
平憤置之曰斯人道學淵懿議論瑩徹非吾曹
所及因刊其卷布長安自是退講於鄉隨人淺

深皆有成就終身無攢眉事一日臨觴不樂謂
弟子誠曰學無體用便分物理性命為二吾學
雖未見用然繕性治世放諸百世無疑也第度
設施可澤於斯人便可出而仕矣尋卒學者尊
為大劉夫子子誠字叔貞讀書國學授湖南訓
教士以不欺為本立行藝二格有一善者記之
行勤誦讀者記之藝月得數人以為老友習容
禮童冠仰焉督學董其昌聞之聘入幕旋擢鹽
山令陞橫州持節定交趾之難所至皆有治績

後卜居青門與崔爾進文翔鳳等結英社有雒
下遺風生平雅度過人寵辱不驚著有杖履三
篇尚書遺旨二卷詳倪元璐志中

此書數月二張輪流抄錄中
不盡風土平壤為其人習
於中亦門地事而主其
其

仲好馮先生

先生名從吾字仲好長安人萬曆己丑進士甫
垂髫即深契王文成公人心有仲尼之語嘗受
知於許督學以聖學為己任端靜寡營出入必
以理學書自隨授庶常每入朝例飯中貴舍先
生獨攜茶餅子處披覽足跡不輕履改御史巡
中城時壬辰大計包匭簞簋不得入權門客胡
汝寧屢彈不去先生以疏逐之神廟中年朝講
廢或飲酣斃左右先生抗疏有云困麴蘖而驩

飲長夜娛窈窕而宴眠終日神宗怒將杖之會
長秋節輔臣救免遂告歸三年還職視長蘆鹽
政清吏弊治奸賈無稍貸有史官求庇先生反
彈之遂與要人左以同臺言事株連削籍歸里
益銳志聖賢之學建關中書院擇士之秀者朝
夕討論一時士心歸之奉爲模楷里居二十六
年四方來學之士有千人稱關西馮夫子光廟
改元累召未行熹廟初與鄉忠介同召時廣寧
失守經撫攜手入關先生疏請逮治以勗守關

將吏遂以中丞佐西臺忠介為御史大夫時有
鍾羽正為左僉都並稱西臺三正人善類每依
為重焉復議紅丸挺擊事羣小側目於是刺講
學者接踵先生與忠介皆求罷又二年起總留
臺未赴即家拜工部尚書是時逆璫猶以人望
羈縻先生不與合因疏辭予致仕次年削籍阿
璫者授意撫臣辱之毀書院曳先師像擲城隅
以洩其憤先生痛如切膚恚恨靡寧跌坐二百
餘日遂以卒後逆黨誅復原官謚恭定著有關

學編疑思錄馮少墟集

中衛劉得炯撰

無知溫先生

續

弟日知附

先生名予知恭毅公長子方就外傳所受書輒
誦暇即整襟坐不作羣兒嬉既長頗精經義務
學益力案頭恆置程朱語錄時馮恭定家居講
學與交最密延之上座以疑義相質先生性儉
約居恆布衣粗礪晏如也不喜見要人間出乘
欵段世目為清公子以恩胄進南雍壹遵國學
科條銖寸不敢違天司成目送之曰何物溫生
邁跡乃爾匿身蕭寺中人莫可踪跡獨執經問

字於焦太史竑欣然有會其功以克己毋自欺
為鵠不欲驚於高遠清虛恭毅公建石梁築學
宮修城施粥為德於鄉予知贊成居多疾革執
兩弟手曰語云朝聞道夕死可矣於道幸非無
聞死矣奚憾言訖逝以子樹瓊官贈戶部郎中
崇祀正學書院郡縣賢祠仲弟日知字與恕萬
厯乙卯舉人生有異質潛心墳典名日以起性
至孝事母夫人惟謹少有過即長跼受教出入
里閭遇先生則執子弟禮論文必化臭腐為神

奇來方伯復文光祿翔鳳皆重之著有嶼浮閣
詩文集帖括研幾等書

信天集詩話

存本外野文

居白張先生續

先生名國祥字百善臨潼人萬厯中進士以理
學自任由大行厯官禮垣戶垣與楊左諸人銳
意傾否每一諫章出天下傳之生平不邇聲伎
喪葬不用佛事馮恭定公嘗稱為名儒沒沈自
彰表之曰理學名臣居白先生云

Blank text area with faint bleed-through from the reverse side of the page.

廉夫趙先生 續

先生名應震膚施人生而莊重沈默少就傅即
勉強力學每進講必究義理所在樂語程朱之
學閱五經性理諸書知聖賢理蘊在此師馮少
墟先生為及門第一弟子主大和書院講比肩
從游者皆師事之歸里讀書清涼山寺購書萬
卷執經問字者盈門天性純孝事孀母盡菽水
歡簞瓢自適不受餽遺會母卒嚴冬不履而跣
歲祲貧益甚弟子或供饘粥終不屑曰菜根滋

味正著述受用物手不釋卷日事討輯有考禮
正樂諸書理學彙編四書五經會心編然未經
大用覺志而歿遠邇痛悼之後二十年督學汪
喬年表其墓曰理學真儒趙公應震之墓

雞山張先生續

先生名舜典字心虞鳳翔縣人萬厯甲午舉人
自諸生潛心理學受知督學許孚遠後游江南
復從許學因徧交鄒南臯顧涇陽馮少墟諸先
輩數年始歸謁選署開州學正與諸生朝夕講
論皆朱程語錄不以舉業為先嘗嘆曰悞天下
人才者八股也陞鄆陵令盡心民事細大必舉
民間養生送死之具皆備儲之以貸貧乏時承
平日久先生製軍器若干皆精好藏之庫人或

訝之先生曰行當有用去任後邊事急州縣
軍器以所貯應之精利為他邑冠創宏仁書院
與諸生講學置經史數千卷為令五年鄆民戴
若父母陞彰德府同知致仕諸生從游者常數
百人天啟改元陞兵部武選員外上疏辭不允
蓋異數也復上疏勸聖學遠宦寺時魏閹已用
事先生特指斥之因有沽名條陳之旨遂不出
著明德錄致曲言及詩文藏於家

子寬盛先生續

先生名以弘字子寬潼關人萬曆中進士選庶
常授檢討人稱小翰林父訥字敏叔隆慶辛未
進士入詞垣人稱大翰林少從馬文莊公游性
仁孝年十七以父都尉德剿洛南盜死誓不與
賊俱生叩請當道捕賊俱擒之歷官吏侍時議
封倭訥抗言倭不退而求款非情宜控要害集
兵糧為自治計倭果復叛訥文章爾雅節操清
正主試最稱得人著有玉堂日記百餘卷定敏

軒集八卷卒謚文定子寬承家學又嘗問業馮
恭定既早發歷官國子監祭酒神宗末引疾歸
光廟踐阼起吏部侍郎慨然以鑑才為己任核
名實抑躁競起用廢棄諸賢汲汲恐後熹廟登
極充日講官敷陳經義因事開導能以至誠動
人主有奏奉天母教進自鳴鐘諸奇器者一切
屏斥並置帝鑑圖說講筵以資法戒是時魏璫
竊政朝紳脂韋趨附致鼎鉉弘正色自立故不
得以閣員用晉禮部尚書歸里憂鬱卒弘性孝

友有休休之度尤嚴取與一介不苟兩世宗伯
卒之日家無長物人咸稱之著鳳手館帖四卷
紫氣亭集十二卷中正學曲學真儒偽儒辨妄
有補於道統

宋

雅

子

其

知

不

賢

生

士

季泰楊先生續

先生名復亨咸甯莊敏公鼎之後天啟癸酉舉
人生而嚴重不知嬉戲年十一輒嚮慕古人初
見馮恭定言志書不愧屋漏行所無事以對年
五十四授長治論遷昌樂令自矢曰一不剝民
肥己二不緩德尚刑三不徇情枉法及署益都
尤注念與民休息四字在昌樂革去助解銀民
間歲省銀二千餘金強冠萬餘壓境家人驚恐
先生曰我朝廷官當以身殉社稷即登城守禦

素性剛方縉紳有不悅者以大計中傷謝政就
道而逆闖破長安遂僑居澤潞同志講學三晉
之士翕然從之丁亥歸里遯跡著書有念祖錄
一卷貫珠講四卷語對一卷編纂有尚友錄就
正錄書紳篇數十卷



